
Dostava informacija u vezi s objavom 'Sarajevo još uvijek nema novo pozorište', od 20.7.2026. godine, autora Maše Karavdića

MKS sport i kultura <mks@mks.ks.gov.ba>

Fri, Jul 24, 2026 at 10:21 AM

To: "istinomjer@zastone.ba" <istinomjer@zastone.ba>

Poštovani,

Obraćamo Vam se povodom objave na portalu Istinomjer.ba pod naslovom „Sarajevo još uvijek nema novo pozorište“, koju je 20. jula 2026. godine objavio autor Maša Karavdić, a u kojoj navodite da nije ispunjeno obećanje ministra kulture i sporta Kantona Sarajevo Kenana Magode, koji je u julu 2025. godine najavio otvaranje novog dramskog pozorišta u Sarajevu početkom druge polovine 2026. godine.

S tim u vezi, želimo ukazati na činjenicu da je u međuvremenu u Općini Novo Sarajevo, na adresi Grbavička bb, sa intenzivnim radom započeo **ICIKUM** – Internacionalni centar igre, kulture, umjetnosti i mladih. Riječ je o savremenom kulturnom prostoru namijenjenom razvoju umjetnosti, kreativnosti i zajednice, koji objedinjuje različite programe – od teatra, filma i muzike do izložbi, radionica i festivala – stvarajući otvoreno mjesto susreta umjetnika, mladih, publike i novih ideja.

U okviru ICIKUM-a osnovan je i započeo s radom **Novi Teatar**, koji je institucionalno naslonjen na Internacionalni centar igre, kulture, umjetnosti i mladih Novo Sarajevo. ICIKUM, kao nasljednik nekadašnjeg Međunarodnog centra za djecu i omladinu Novo Sarajevo, ima misiju okupljanja i razvoja mladih kroz obrazovne, kulturne i festivalske programe, dok Novi Teatar predstavlja njihov prirodni umjetnički nastavak – prostor u kojem mladi umjetnici prelaze iz procesa obrazovanja u profesionalni umjetnički rad.

Također, Sarajevo je dobilo novi teatarski prostor – **Teatar 071**, na adresi [Sime Milutinovića 2/II](#). Ovaj teatarski prostor osnovan je i započeo je s radom uz značajnu finansijsku podršku Ministarstva kulture i sporta Kantona Sarajevo, koje od njegovog osnivanja kontinuirano podržava njegov rad. Teatar 071 publici nudi jedinstven koncept „teatra u stanu“, koji karakterišu intimna atmosfera, neposredna blizina glumaca i publike, snažan emotivni doživljaj te gostovanja i nastupi istaknutih glumaca iz Sarajeva i regiona.

Imajući u vidu navedene činjenice, smatramo da objava sadrži činjenično netačnu tvrdnju da Sarajevo „još uvijek nema novo pozorište“, odnosno da ne odražava stvarno stanje u oblasti pozorišne i kulturne infrastrukture. Uzimajući u obzir da su u međuvremenu uspostavljeni i započeli s radom Novi Teatar u okviru ICIKUM-a, kao i Teatar 071, smatramo da postoje osnovi za preispitivanje zaključaka iznesenih u predmetnoj objavi.

Ljubazno Vas molimo da navedene činjenice uzmete u obzir te, u skladu s njima, razmotrite ažuriranje ili dopunu predmetne objave kako bi informacije dostupne javnosti bile potpune, tačne i zasnovane na utvrđenim činjenicama.

S poštovanjem,